



## Korištenje zadnjih deset noći ramazana i Noći kadra (Meka)

Hatib: dr. Abdullah ibn Avad el-Džuheni

18. ramazan 1442. po Hidžri / 30. april 2021.

Sva hvala i zahvala pripadaju Allahu. Samo Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, koji druga nema, i svjedočim da je Muhammed, sallallahu alejhi ve sellem, Njegov rob i poslanik.

Uzvišeni Allah kaže: “O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao - postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su nove stvari, svaka nova stvar u vjeri je novotarija, svaka novotarija je zabluda, a svaka zabluda vodi u Vatru.

O ljudi, bojte se Allaha, jer je bogobojažnost najunosnija trgovina i poputnina, i čuvajte se grijehа i nepokornosti Allahu, jer je propao čovjek koji je zanemario i oglušio se o Allahove naredbe.





Cijenjeni postači, prošla je većina ramazana, kao da je trajao jedan sat ili jedan trenutak, i nastavlja ići svojim tokom, i neće se zaustaviti zbog lijenosti i nemarnosti lijelih i nemarnih. Njegova povorka polazi, ne čekajući posrnulog i ne budeći zaspalog. Ostao je je još samo jedan njegov mali dio, a u to malo pohranjeno je veliko dobro i neprocjenjiva nagrada, jer djela se vrednuju prema završnicama.

Cijenjeni postači, ne zaboravite odabranost i blagoslovljenost vremena u kojem se trenutno nalazite i koje živite, pa ga ispunite sa koliko god možete dobrih i pobožnih djela. Ako tvoja duša klone, sjeti se riječi Uzvišenog: “I samo se Gospodaru svome obraćaj!” (El-Inširah, 8), a ako je obuzme lijenost, sjeti se riječi Uzvišenog: “I radi Gospodara svoga trpi!” (El-Muddessir, 7).

Molimo Allaha da popravi ono što je prošlo i što je ostalo, i da ga učini svjedokom za nas, a ne protiv nas, svjedokom koji će svjedočiti o predanosti i ibadetu vjernika i njegovoj blizini Gospodaru, i koji će svjedočiti o nemarnosti onih koji su bili nemarni. Ukoliko želi postići sreću na ovom i budućem svijetu, čovjekov fokus treba biti na tome da mu djela budu primljena, kabul kod Allaha, a ne na samim djelima.

Ibn Redžeb, Allah mu se smilovao, rekao je: “Fokus treba biti na tome da djela budu primljena, a ne na samom činjenju djela. Prava mjera nisu djela tijela, nego iskrenost i čistoća srca. Možda će onaj koji probdije noć u ibadetu od svog ibadeta imati samo bdijenje. Koliko je samo klanjača uskraćeno za milost, a koliko je spavača obasuto milošću! Ovaj spava, a srce mu spominje Allaha, a onaj klanja, a srce mu grešno. Kada se kriteriji podignu, izjednači se spavač sa klanjačem. Ali, čovjeku je naređeno da se trudi u postizanju dobra i činjenju dobrih djela, a svakome je olakšano ono za što je stvoren.”

Ibrahim i njegov sin Ismail, alejhimus-selam, nakon što su podigli temelje Allahove časne Kuće, s velikom strepnjom tražili su da njihovo djelo bude kabul kod Gospodara svjetova, iz straha da neće biti primljeno od njih. Uzvišeni kaže: “I dok su Ibrahim i Ismail temelje Hrama podizali, oni su molili: ‘Gospodaru naš, primi od nas, jer Ti, uistinu, sve čuješ i sve znaš!’” (El-Bekara, 127)





Trudite se, Allah vas čuvao od svakog zla, da vaša djela budu iskrena, i u preostalim danima ramazana činite što više dovu Allahu da primi vaša djela, i tražite Allahovu milost u činjenju što više dobrih djela, učenju Kur’ana, tekbiru, rukūu, sedždi, tehlilu (riječima la ilahe illallah), tesbihu (riječima subhanallah), tahmidu (riječima elhamdulillah), dijeljenju sadake i dobročinstvu prema ubogima i siromašnima. Uzvišeni kaže: “Svako se okreće prema svojoj kibli, a vi se potrudite da druge, čineći dobra djela, pretečete! Ma gdje bili, Allah će vas sve sabrati – Allah, zaista, sve može.” (El-Bekara, 148)

Znajte, Allah vam se smilovao, da je najbolji dio ovog mjeseca njegovih zadnjih deset dana. U njemu je blagoslovljena noć: “Noć kadra je bolja od hiljadu mjeseci – meleki i Džibril, s dozvolom Gospodara svoga, spuštaju se u njoj zbog odluke svake, sigurnost je u njoj sve dok zora ne svane” (El-Kadr, 3 – 5); “u kojoj se svaki mudri posao riješi” (Ed-Duhan, 4), tj. zapisuju se događaji i sudbine.

U toj noći Gospodar spaja i razdvaja, daje i uskraćuje, uzvisuje i unizuje, usmrćuje i oživljava, usrećuje i unesrećuje. Provodi se ono što su zapisala pera sudbine. Poslanik, sallallahu alejhi ve sellem, u zadnjoj trećini ramazana povećavao je ibadet i na to je podsticao svoje ukućane.

Majka pravovjernih Aiša, radijallahu anha, kaže: “Kada bi nastupilo deset zadnjih dana ramazana, Poslanik, sallallahu alejhi ve sellem, provodio bi noći u ibadetu, budio bi porodicu, i ne bi se intimno približavao svojim suprugama.” (Buhari)

Tirmizi, Ibn Madža, Nesai i Ahmed bilježe od majke pravovjernih Aiše, radijallahu anha, da je rekla: “Upitala sam Allahovog Poslanika: ‘Kada bih znala koja noć je Lejletul-kadr, šta bi govorila u njoj?’, a on je rekao: “Kaži: ‘Allahumme inneke afuvvun tuhibbul-afve fa’fu anni! – Allahu moj, Ti mnogo praštaš, voliš oprost, pa mi oprosti!’” Ova Poslanikova, sallallahu alejhi ve sellem, uputa ukazuje na njegovu brigu i privrženost ibadetu i korištenje blagoslovljenih i odabranih vremena, pa se od muslimana očekuje da slijedi Vjerovjesnika, sallallahu alejhi ve sellem, jer on je njegov uzor i primjer, da poveća svoj ibadet i da ne propusti nijedan trenutak ovih





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,  
NIŠTA MANJE NE ZAOSTAJE NI ODABIR TEME, ODNOSNO MATERIJE  
KOJU TOKOM HUTBE ELABORIRA." (PREPOROD)

**HUTBE** 

blagoslovljenih noći i dana, jer ne zna da li će ih dočekati drugi put ili će ga preteći ona koja prekida užitke i rastavlja bliske, a to je smrt koja će doći svakom čovjeku kada nastupi njegov edžel i završi se njegov život, da se ne bi kajao onda kada mu kajanje neće koristiti.

Zatim, znajte da vam Allah naređuje jednu veliku stvar: „Zaista, Allah i Njegovi meleki blagosiljaju Poslanika. O vi koji vjerujete, blagosiljajte ga i vi i šaljte mu pozdrave.“ (El-Ahzab, 56)

Poslanik, sallallahu alejhi ve sellem, je rekao: "Ko namene donese jedan salavat, Allah će na njega donijeti deset salavata."

Allahu, blagoslovi Muhammeda i porodicu Muhammedovu, kao što si blagoslovio Ibrahima i porodicu Ibrahima. Ti si Hvaljen i Slavljén. Allahu, podari blagoslov Muhammedu i porodici Muhammedovoj, kao što si podario blagoslov Ibrahimu i porodici Ibrahimovoj. Ti si Hvaljen i Slavljén.

